

NOVOSTI

KONFERENCIJA „OBRAZOVANJE KAO STRATEŠKO FILANTROPSKO ULAGANJE“

U sklopu obilježavanja deset godina postojanja, decenije radosti, uspjeha i ostvarenih snova, Fondacija Hastor ove godine pripremila je niz događaja kojima obilježava ovaj jubilej. Još jedan u nizu pomenutih događaja je i konferencija „Obrazovanje kao strateško filantropsko ulaganje“ održana 13. maja u hotelu Bristol.

Cilj konferencije je bio uspostavljanje platforme saradnje medija i organizacija koje se bave ovom vrstom aktivnosti da bi se mediji što više uključili u promociju filantropije kao strateškog ulaganja u obrazovanje. Konferencija je ovom prilikom okupila fondacije i organizacije koje rade i filantropski djeluju naročito u sferi obrazovanja, a panelisti iz fondacija Catalyst, Ana i Vlade Divac, Rotary club Hrvatska, te Atlas Fondacija iz Crne Gore predstavili su svoje, ali i druge pozitivne primjere filantropije u regionu.



Jelena Bekčić, program menadžerica za prikupljanje podataka Fondacije Catalyst, prezentirala je istraživanje koje sublimira filantropske aktivnosti u jugoistočnoj Evropi. Prema ovom istraživanju, Bosna i Hercegovina je vodeća kada su u pitanju filantropska ulaganja u obrazovanje u odnosu na druge zemlje u regionu. „Korporativni i individualni donatori prepoznali su važnost ove teme te je u Bosni i Hercegovini, ulaganje u obrazovanje veće nego u ostalim zemljama regiona“ istakla je Jelena te dodala da je čak 66% od ukupnog ulaganja u obrazovanje namijenjeno dugoročnim investicijama što pokazuje opredijeljenost donatora za razvoj i jačanje ove oblasti.

Naglašen je i značaj angažmana javnih ličnosti u promociji filantropije, te veći angažman medija, a istaknuta je i potreba za sudjelovanjem kompanija u aktivnostima koje će promovirati filantropiju. U drugom dijelu panela predstavljene su prakse medija i kompanija te načini kako se kroz zajedničko djelovanje može postići više kada je u pitanju ova bitna oblast. Učesnici panela su bili predstavnici kompanija Coca Cola Hellenic, Authority Partners te magazina Azra, TV1 i SOS Dječija sela BiH.

Ovo je prva regionalna konferencija ovoga tipa i nadamo se da će ovo biti samo jedna u nizu od konferencija koje imaju za cilj promoviranje filantropije te da će već naredne godine jedna od ovakvih konferencija biti organizovana i u zemljama regiona. Meliha Meli Ramusović iz Atlas fondacije pozdravila je ovaj projekat i izrazila želju da sljedeće godine budu domaćini slične konferencije u Crnoj Gori.

„Problemi poput odliva mozgova i nezaposlenosti mogu se riješiti koordiniranim i udruženim inicijativama. Potrebno je poslati poruku mladima da neko vidi i primjećuje njihov trud i rezultate, i zajedničkim snagama stvoriti čvrst oslonac mladima koji će budućnost vidjeti u našem regionu“ poručila je Meliha.

Ova konferencija predstavlja samo jedan u nizu događaja predviđenih u Fondaciji Hastor povodom obilježavanja desete godišnjice. Pratite nas jer nas u narednom periodu očekuje mnoštvo drugih događaja i sadržaja.



MATURANTSKA PARADA

Fondacija Hastor je i ove godine ispratila maturante srednjih škola. Fondacija je već godinama partner maturantske parade, a ove godine, u sklopu obilježavanja 10 godina postojanja, u paradi su učestvovali i naši stipendisti.

U petak, 20. maja zajedno sa 30000 maturanata Evrope iz dvanaest evropskih zemalja, maturanti su otplesali zajedničku koreografiju Quadrilla uz Štrausovu muziku i na taj način bili dio velike evropske maturantske zajednice.

Fondacija Hastor koja je dugogodišnji partner ovog projekta, zajedno sa ASA Prevent Grupacijom je za sve maturante osigurala plave i žute majice, kao i

kišobrane koji su služili kao rekvizit u koreografiji.

Stipendisti Fondacije Hastor i sarajevski maturanti su se okupili na Trgu Djece Sarajeva, odakle su u velikoj povorci sa plavim i žutim majicama, prodefilovali sarajevskim ulicama do Sarajevo City Centra. Ispred SCC-a ih je čekala muzika i zainteresirani prolaznici koji su sa nestrpljenjem iščekivali ples Quadrilla, kojim su maturanti proslavili kraj školovanja, a pored plesa formirali su i zastavu BiH.

Da bi sadržaj ovog projekta bio bogatiji, pobrinula se plesna akademija Romantik koja je pripremala maturante za ovaj jedinstveni događaj koji je preko satelitskog radijskog signala bio povezan i sa ostalim učesnicima ove parade koja već 10 godina ima za cilj obaranje svjetskog rekorda, kao i dobru zabavu. Nakon završenog programa maturanti su imali priliku zabaviti se na Teralnoj rivijeri Ilidža na pool party-ju, a te večeri su neki također zapjevali uz Amela Ćurića u My Face kafeu.

Pored maturantske parade, Fondacija Hastor sprema još niz događaja.

Sadžida Kosovac



ODABRANI POBJEDNIČKI RADOVI!

U okviru obilježavanja desete godišnjice, krajem aprila je održana izložba likovnih radova stipendista Fondacije Hastor pod nazivom „Decenija radosti“. Kao što smo i obećali odabrali smo pobjedničke radove u kategorijama osnovnih, srednjih škola i fakulteta. Na našu adresu stigao je veliki broj radova i tročlana komisija je pred sobom imala veoma težak zadatak. Za autore pobjedničkih radova obezbjeđene su simbolične nagrade. Pobjednički rad u kategorijih osnovnih škola je naslikala Tiro Fikreta

učenica 8. razreda Druge osnovne škole iz Bugojna, u kategoriji srednjih škola Belma Gutlić, učenica 3. razreda Mješovite srednje škole iz Bosanskog Petrovca, a u kategoriji studenata Mehmed Mehić iz Bužima, student 2. godine Muzičke akademije u Sarajevu. Posebna nagrada je obezbjeđena za Anisu Karić, učenicu 2. razreda Četvrtе gimnazije na Ilidži, čiji rad je krasio pozivnicu za ovu likovnu izložbu. Pobjedničke radove možete pogledati u rubrici „Decenija radosti – pobjednički radovi“.



Džulisa Otuzbir

ŽELJKO SIMEUNIĆ

U rubrici „Stipendisti“ donosimo vam priču Željka Simeunića, učenika srednje škole Jovan Dučić u Tesliću koju, uprkos fizičkim poteškoćama, završava kao učenik generacije. Snaga duha i želja za napretkom donijele su Željku brojne uspjehe, a Fondacija Hastor se itekako ponosi postignućima naših stipendista i rado ih promoviše.

Željko živi u Čečavi sa roditeljima, sedmero braće i sestrom. Pohađa srednju školu Jovan Dučić u Tesliću. U slobodno vrijeme uči njemački jezik, voli da pjeva narodnu i izvornu muziku. Ove godine izabran je za učenika generacije četvorogodišnjih zanimanja. Kaže kako je oduvijek bio odličan učenik, te kako ne zna i

ne želi drugačije. Nažalost, Željko od samog rođenja ima problem sa vidom. Nakon mnoštva pregleda, ustanovljen mu je nistagmus na oba oka, te svaki vid operacije nosi jako male šanse za popravljjanje situacije. Koristi se govornim softverima koji mu u jednu ruku olakšavaju život. Stipendista Fondacije Hastor je punih osam godina. Ističe da je uz našu Fondaciju stekao mnoštvo prijatelja, te kako mu je ova stalna podrška od velikog značaja. U subotu, 28. maja, na maturalnoj zabavi proglašen je učenikom generacije i nagrađen za odličan uspjeh od strane škole. Otkriva kako se odmalena želio baviti politikom te ima želju da upiše Fakultet političkih nauka u Banja Luci.

“Čovjek koji hoće nešto da postigne mora biti prije svega uporan - i uspjeh će. Ja nikad nisam odustao i neću dok god zadnji atom snage i samopouzdanja imam. I pomažite drugima, trud se isplati uvijek, nerad nikada.” Nadamo se da će Željko ostvariti svoje snove, a s obzirom na količinu truda koji na tom putu ulaže, ne sumnjamo da je uspjeh zagarantovan.



Hanka Mujkić

UČITELJEV KUTAK

MAJ 2016.

Za 14. maj 2016. godine zakazali volontiranje Goletić Dženita i Sadiki Roki u mjesnoj zajednici „Centar“ u Živinicama od 8 do 13 sati sa 10 osnovaca i 13 srednjoškolaca. U Brčkom istog dana od 11 do 16 sati u prostoru Islahijeta Fazlović Alma i Čosović Adelisa sa 8 srednjoškolaca, Arnautović Almir i Bajraktarević Asmir sa 12 osnovaca, Mujagić Nedim i Mustić Elmina sa 7 srednjoškolaca, Medinić Jasmina i Junuzović Varisa sa 6 srednjoškolaca. Dakle 10 studenata, 22 osnovca i 36 srednjoškolca što je ukupno 66 stipendista Fondacije Hastor koji će se odvojiti pet sati od ulice i njenog negativnog uticaja na mladu ličnost. Ovih 330 volonterskih sati me prosto prisiliše da u 9 sati budem u Živinicama i da se družim sa tih 25 mladih osoba jedan čas, a onda oko 12 sati stižem u Brčko i pridružih se grupi od 8 studenata i studentica i 30 učenika i učenica. Kad uđoh u učionicu Alma mi se pohvali da se ona kao studentica obratila direktoru fakulteta u čijoj je nadležnosti Islahijet i zamolila ga da joj odobri korištenje ovog prostora, objasnivši mu da je to za druženje stipendista Fondacije Hastor što je on njoj kao vrijednoj studentici ovog fakulteta odobrio, a čak je i pohvalio to druženje. Pitam stipendiste šta mi mogu reći vezano za volontiranje a oni se rasprisaše, pa pričaju li pričaju. Saznadoh da su vrijedni đaci i da su vrlo aktivni u svojoj školi u svojoj okolini kao i u mjesnoj zajednici u kojoj organizuju akcije čišćenja okoline. Jedna učenica reče da ona zna roditelja koji u kafani troši novac

od stipendije, a jedan učenik dodade: „Ih ja znam isto roditelja koji u kladionici ostavi veći dio stipendije!“ Jedna studentica reče: „Ja mislim da je to velika i sramota i grehota, tako halal novac kao što je stipendija trošiti u tako haram svrhe kao što su alkohol i kocka!“ Svi se složismo da je u pravu. Dogovorismo se da o ovome izvijeste administrativni tim Fondacije Hastor, a oni iz administracije će znati šta treba uraditi. Rado bih još razgovarao sa ovako pametnom djecom ali me čekaju druge obaveze.



U Goraždu u „Bingu“ Hadžović Melisa zakazala druženje sa učenicima osnovne škole od 12 sati. Kako je Melisa vrlo odgovorna, komunikativna i druželjubiva, iskoristila je te svoje sposobnosti da se nametne grupi osnovaca iz osnovne škole „Fahrudin Fahro Baščelija“ stipendista Fondacije Hastor, da je poštuju i slušaju. Imala je pripremljen program za ovo druženje, ali ga je korigovala na zahtjev učenika. Kako su učenici željeli da dobiju što bolje ocjene iz matematike, zamolili su je da im u tome pomogne, što je Melisa vrlo rado prihvatila. Na moje pitanje šta je za danas planirala kaže: „Umjesto teme koju sam planirala



obraditi sad ću održati dva sata dodatne nastave iz matematike, a ostalo vrijeme ću provesti prema ranije uplaniranom, a to je posjeta staračkom domu. Dogovorila sam se sa posjetom tamošnje starce i starice, da ih pitamo kako žive, koga imaju, a i da im pričamo o nama i da se jednostavno malo družimo, jer vjerujem da ćemo im malo uljepšati ovo popodne.“ Dok smo mi razgovarali stiže i Seid Fijuljanin, direktor Fondacije Hastor, pa se i on uključi u razgovor. Pita ih o učenju, a oni se hvale da su vrijedni đaci i da im Fondacija Hastor puno znači, kako zbog novca koji dobijaju u vidu stipendije tako i zbog ovog druženja. Jedna učenica se pohvali: „Mene je učitelj Ramo odabrao pa sam provela 21 dan na odmoru u Holandiji u junu 2011 godine!“, a Melisa dodade: „Pa i mene je i odabrao i vodio 2007 godine isto u Holandiju, to je nezaboravno kako nam je bilo lijepo.“ Tada Seid reče: „Da, to je Fondacija Hastor, fondacija koja želi da pomogne djeci u svakom pogledu.“ Još malo porazgovarismo pa se pozdravismo. Ostavismo ih da se druže, a Seid i ja krenusmo dalje.



1. Mjesto - Fikreta Tiro
Druga osnovna škola Bugojno



Specijalna nagrada
Anisa Karić
Četvrta gimnazija Ilidža




1. Mjesto - Mehmed Mehić
Muzička akademija, Bužim



2. Mjesto - Mirza Murga
Stomatološki fakultet, Livno




2. Mjesto - Dina Karić
Četvrta osnovna škola
Ilidža



1. Mjesto - Belma Gutlić
Mješovita srednja škola Bosanski Petrovac



3. Mjesto - Mirza Đulić
Agromediteranski fakultet, Konjic



3. Mjesto - Edna Đuliman
Druga osnovna škola Bugojno



2. Mjesto - Amina Bašić,
Prva gimnazija, Zenica



3. Mjesto - Semra Islamović
SMS Zijah Sokolović, Fojnica

/ STIPENDISTA MJESECA

DŽULISA OTUZZBIR

Džulisa Otuzbir, studentica druge godine Fakulteta političkih nauka u Sarajevu na smjeru Međunarodni odnosi i diplomatija gdje je i jedna od najboljih studenata, ovoga mjeseca ponijela je titulu stipendistice mjeseca, zahvaljujući svom velikom zalaganju kao urednice našeg biltena i angažmanu u drugim aktivnostima Fondacije Hastor.



Osnovnu školu je završila u Opari (Novi Travnik), a zatim Opću gimnaziju u Travniku gdje je oba puta proglašena učenicom generacije. Stipendistica Fondacije Hastor je već deset godina, i jedna je od prvih stipendista ove fondacije. Nakon završetka srednjoškolskog obrazovanja Džulisa odlučuje da upiše Međunarodne odnose i diplomatiju na Fakultetu političkih nauka u Sarajevu. Oduvijek ju je zanimalo kako funkcioniše međunarodni sistem, kao i kako su uređeni odnosi među državama, međunarodnim organizacijama i drugim međunarodnim akterima. Zahvaljujući tome što se nastava odvija na bosanskom i na engleskom jeziku uspjela je da usavrši svoj engleski jezik. Svoj uspjeh na fakultetu objašnjava ljubavlju i predanošću prema onome što studira, jer kako Džulisa kaže, sve je nekako lakše kada radite ono što volite.

Voli da piše, a ljubav prema pisanju dokazuje angažmanom u Redakciji Fondacije Hastor, gdje se nalazi na poziciji urednika mjesečnog biltena. Slobodno vrijeme koristi da uči njemački, turski i španski jezik, a želja joj je i da nauči i druge jezike. Jako je komunikativna i voli da se druži, pa stoga uvijek nalazi vremena za prijatelje. Voli da čita i veliki je ljubitelj sporta. Rado volontira u Fondaciji Hastor i učestvuje u svim njenim aktivnostima.

„Prijatelji i porodica moja su najveća podrška i podstrek. Pod prijateljima i porodicom smatram i moju Fondaciju Hastor. Kada vas neko deset godina prati, podržava, iznova motivise i uči istinskim vrijednostima, zaista se ne može smatrati drugačije. Fondacija Hastor stvara jedno bolje društvo. Svoju misiju i vrijednosti pažljivo prenosi na svoje stipendiste, a njeni stipendisti, poučeni ovim vrijednostima, postaju bolje i zrelije osobe željne uspjeha i sa kapacitetom da naprave velike promjene. Jednoga dana, kada budu držali konce u svojim rukama, kada budu spremni da se sami suoče sa izazovima, kada postanu uspješni i sposobni ljudi, stipendisti Fondacije Hastor će sigurno pomoći nekome baš kao što je Fondacija pomogla njima. Tako Fondacija Hastor stvara savršen krug, jedan lanac filantropije i najzad, jedno bolje društvo.“

Sadžida Kosovac

/ RAD MJESECA

KUĆA

O dušo mirna nemoj mi spiti
Sa izvora istog svi ćemo piti.
Taj lijek što nigdje kraja nema
Što bolest u zaborav sprema.

Kao lagani topoti što se čuju u mraku
Milujem rukom svoju majku
Opojni mirisi sretno mladosti
U svjetlosti i sjaju tople radosti.

Ponekad tama zakloni sjaj
Ptica u mraku ponekad skrene
Kad svako misli da je kraj
Oblak sudbine tek tada krene.

Oči u mraku što vidjeti mogu
Osjećaj u tmini što jadan zna,
Da li će krhak otpustiti stegu
I krenuti iznova u novi dan.

Što čisti biser u vodi sjaji
Lađa na pučini divan je prizor
Duša smirena sretna se gaji
I svaka se vraća na svoj izvor.

Nudžejma Karkelja
OŠ Mehmedalija Mak Dizdar

Sarajevo